

**Ilaqutarittut inuunermut iluaqutaanerumik sulisoqarnermut politikkeqalernissaq
anguniarlugu Naalakkersuisut UPA2017-mut iliuusissanik nassuiaasiornissamik
peqquneqarnissaannik Inatsisartut aaliangiiffigisassaattut siunnersuut**

(Inatsisartunut ilaasortaq Debora Kleist, Inuit Ataqatigiit)

pillugu

Inuussutissarsiornermut Ataatsimiititaliap

siunnersuut aappassaaneerpeqarneranut

ISUMALIUTISSIISSUTAA

Inuussutissarsiornermut Ataatsimiititaliap suliarinninnermini ilaasortarai:

Inatsisartunut ilaasortaq Mimi Karlsen, Inuit Ataqatigiit, siulittaasoq
Inatsisartunut ilaasortaq Justus Hansen, Demokraatit, siulittaasup tullia
Inatsisartunut ilaasortaq Vivian Motzfeldt, Siumut
Inatsisartunut ilaasortaq Nikolaj Jeremiassen, Siumut
Inatsisartunut ilaasortaq Kelly Berthelsen, Inuit Ataqatigiit

1. Siunnersuutip imarisaa siunertaalu

Ilaqutarittut inuunermut, tassungalu ilanngullugu erninermut atatillugu atugassarititaasut
eqqarsaatigalugit iluaqutaanerumik nunatsinni inuiaqatigiinni sulisoqarnermut
politikkeqalernissaq qanoq anguneqarsinnaanersoq pillugu nassuiaammik
saqqummiussisoqarnissaa siunnersuuteqartup kissaatigaa.

2. Siunnersuutip Inatsisartuni siullermeerneqarnera

Siunnersuut oqaaseqartartunit Naalakkersuisunillu tapersorsorluarneqartoq
Inuussutissarsiornermut Ataatsimiititaliamit oqaatigineqassaaq. Inatsisartunit
naalakkersuinikkut oqariartuut tamanna Inuussutissarsiornermut Ataatsimiititaliamit
tusaatissatut tiguneqarpoq.

3. Ataatsimiititaliap siunnersuummik suliarinninnera

Suliffeqarnermi aaqqissuussisimaneq suliffeqarnikkut sulisartunut ataasiakkaanut piunasaqaatit pisut ilaanni suliffeqarnikkut pisariaqartinneqartut ilaqutariinnillu pisariaqartinneqartut akornanni assortuussinnaasarmata Inuussutissarsiornermut Ataatsimiititaliamit aallarniutigalugu oqaatigineqassaaq. Taamaattoqarsinnaasarpoq assersuutigalugu nikittaalluni sulinermi imaluunniit pisuni allani piffissani kipungasuni sulisoqartariaqartillugu. Suliffeqarnermi illuatungeriit suliffeqarnermut qanorpiaq aaqqissuussinerat akuleruffigissallugu kissaatigineqanngimmat aallarniutigalugu erseqqissassallugu ataatsimiititaliap pingaartippaa, ataatsimiititaliamilli pingaartutut isigineqarpoq ilaqutariinnut meerartalinnut suliffeqarnermi atugassarititaasut paasinarsisinneqarlutillu misissorneqarnissaat.

Inuunerup ingerlarngani sumiikkaluaraanni amerlasuunut takornartaagunangilaq suliffeqarnerup ilaqutariussutsimut naleqqussarniarnerani akimmisaaruteqartarnerata misigisarnera. Akimmisaarutit taakku inuttut nammineq ilaqtalluunniit ikiorsiullugit amerlanertigut aaqqinniarneqartarput.

Suliffeqarnerup ilaqutariittut inuunerup akornanni naleqqussaaniarnikkut ajornartorsiutinut ataatsimoortumik aaqqiissutit amerlanngillat, tamatuma inernerigajuppaa ilaqutariit taakkulu pisariaqartitaat suliffiup pisariaqartitaanut naleqqussartarnerat.

3.1 Iliuusissat nassuiaammi paasinarsisinneqartussatut kissatigineqartut

Siunnersuuteqartup oqaaseqaammuni immikkoortut assigiinngitsut, siunnersuuteqartup naliliinera malillugu suliffeqarnermi aaqqissuussinerit ilaqutariinnut naleqqunnerusut siuarsarneqarnissaannut peqataaqaataasinnaasut taasaqarfigai, taakkununga ilaapput erninermi pissutsit aammalu paaqqinnittarfeqarnermut tunngasuni pisariaqartitsinerup qulaajaavigineqarnissaa, paaqqinnittarfinni inissanik amigaateqarneq aammalu paaqqinnittarfiit ammasarfii. Ataatsimiititaliap isumaa malillugu pissutsit allarpassuit suliffeqarnerup ilaqutariittullu inuunerup akornanni aamma sunniuteqartarput. Tamatumunngali atatillugu ataatsimiititaliamit kaammattuutigineqassaaq ernineq paaqqinnittarfinnilu inissaqassuseq pillugu apeqqut, tamatumalu inunnut suliffeqartunut ilaqutaqarlutillu meeralinnut sunniuteqarnera nassuiaatissami immikkut isummerfigeqqullugit.

Angajoqqaat piffissani kipungasuni sulisartut unammilligassaat ataatsimiititaliap erseqqinnerusumik iserfigissannilai. Soqutiginnillutilli atuartut atorsinnaasaat sammisamut tunngasut ataatsimiititaliamit innersuussuteqarfigineqarput.¹ Erninermit aaqqissuussinerup

¹ <http://www.sfi.dk/publikationer/dilemmaet-arbejdsliv-familieliv-i-norden-8969/>
<http://www.projektboernepasning.dk/index.asp>
<http://www.stm.dk/publikationer/ligestillingsarbejde/kap04001.htm#4.5>

pitsaanerusup qanoq aningaasalersorneqarsinnaanerata nassuiaammi aamma sammineqarnissaa Inuussutissarsiornermut Ataatsimiititaliamit naleqquttutut isigineqarpoq. Allaffissornermi sulisutigut aningaasatigullu nukissaqartoqarpat aningaasalersueriaatsit amerlanerusut nassuiaatissami aamma ilaatinneqarsinnaappata aalajangiisartut aalajangiinissaminut tunngavissaat patajaannerussagaluarput.

3.2.1 Apeqqutit nassuiaatikkut aamma paasinarsisinneqarsinnaasut

Siuliani oqaatigineqareersutut inuup sulinera assigiinngitsorpassuarnit sunnerneqartarpoq. Apeqqutit arlallit Naalakkersuisut nassuiaammi ilanngutissallugit toqqarsinnaasaat Inuussutissarsiornermut Ataatsimiititaliamit matumani taakkartorneqassapput.

Suliffeqarfinni amerlanerni piffissaq suliffiusoq aalajangersimasuuvoq allanngorartuunani. Tamatuma kingunerisaanik ilaqutariit inuunerat piffissamut suliffiusumut naleqqussarneqartariaqartarpoq. Sulisartut amerlanerpaartaat ulluunerani suli sulisartuupput (naak naak akunnerit ullukut suliffiusutut isigineqartartut sivitsoriartoraluartut), soorluttaaq amerlanerpaartaasa sapaat qasuersaarfittut isigisaraat. Piffissarli suliffiusoq allanngorariartorlunilu nikerarnerujartarpoq.

Tamannalu sulisartunut ataasiakkaanut taakkulu ilaquataannut soorunami kinguneqarpoq. Tassungaa atatillugu angerlarsimaffimmi sulinerup atorneratigut sulinermik aaqqissuussinerup eqaannerunissaanut periarfissat ilaqutariit meerartallit meeqqat napparsimaneranni allatulluunniit pisoqartillugu angajoqqaat suliffigisaminut tunngatillugu unammilligassaannut aaqqiissutissatut atorneqarsinnaanersut Naalakkersuisunit mисsossoqqissaarneqarsinnaappata Inuussutissarsiornermut Ataatsimiititaliamit soqutiginarinneqarpoq. Piffissap suliffiusup eqaannerusumik aaqqissuunnissaanut nunatsinni pisortani sulisitsisut annerpaartaattut Naalakkersuisut siuttuunissaminut periarfissagissaartut Inuussutissarsiornermut Ataatsimiititaliaq isumaqarpoq.

Piffissami allanngorartumi sulinissamut aammalu qaangiuttoornikkut sulinerunikkullu katersat ulluni qasuersarfiusutut atorneqarsinnaanerannut aaqqissuussinissamut pisortat periarfissaat nassuiaammi ilanngullugit misissorneqarsinnaapput. Aaqqissuussinerit taamaattut ilaqutariit meerartallit ilaqutariittut inuunerup suliffeqarnerullu akornanni naleqqussaasinnaanerannut peqataaqataasinnaasut Inuussutissarsiornermut Ataatsimiititaliamit aallaaviatigut isigineqarput.

3.2.2 Naalakkersuisut allannguutissatut siunnersuutaat

Siunnersuutip matuma siullermeerneqarneranut allannguutissatut siunnersuummik matuma kinguliani allassimasumik Naalakkersuisut saqqummiussisut Inuussutissarsiornermut Ataatsimiititaliamit maluginiarneqarpoq:

”Ilaqutarittut inuunermut iluaqutaanerusumik sulisoqarnermut politikkeqalernissaq anguniarlugu Naalakkersuisut UKA2017-mut iliuusissanik nassuiaasiornissamik peqquneqarnissaannik Inatsisartut aaliangiiffigisassaattut siunnersuut.”

Allaffissornikkut isiginiagassat tunngavigalugit nassuiaatip UPA17-imi pinnani UKA17-imi saqqummiunneqarnissaata Naalakkersuisunit kissaatigineqarnera eqqaassanngikkaanni allannguutissatut siunnersuutip siunnersuutaqqaartoq ataatsimut isigalugu assigaa. Naalakkersuisut allannguutissatut siunnersuutaata tapersorsornissaanut akornutissaqanngitsoq Inuussutissarsiornermut Ataatsimiititaliaq isumaqarpoq. Allannguutissatut siunnersuut akuerineqassasoq Inuussutissarsiornermut Ataatsimiititaliamit inassutigineqarpoq.

4. Siunnersuutip aningaasaqarnikkut kingunerisassai


Aalajangiiffigisassatut siunnersuutit piviusunnngortinneqarneranni kingunerisassat siunnersuummut tunngavilersuummi nassuiaatigineqartassasut Inatsisartut suleriaasianni § 33, imm. 1-imi allassimavoq. Tamanna naapertorlugu siunnersuut suliarineqarsimasoq ataatsimiititaliamit maluginiarneqarpoq. Aammalu siunnersuutip aningaasaqarnikkut kingunerisinnaasai siunnersuuteqartup tamanna naapertorlugu nassuiarlugillu takussutissiorpai.

5. Ataatsimiititaliap inassuteqaatai

Ataatsimiititaliap isumaqatigiittup Naalakkersuisut allannguutissatut siunnersuutaat akuerineqassasoq inassutigaa.




Mimi Karlsen,
Siulittaasoq




Justus Hansen
siulittaasup tullia



Vivian Motzfeldt



Nikolaj Jeremiassen



Kelly Berthelsen